

आकाशवाणी जयपुर-अजमेर
प्रादेशिक समाचार
दिनांक 21.04.2025 समय: 18.45 बजे

- अमेरिका रा उपराष्ट्रपति जे.डी. वेंस रो पिरवार सागे आज जयपुर आवण रो कार्यक्रम-ऐतिहासिक ठौड़ां ने देखेला अर बिजनेस समिट ने संबोधित करेलां
- प्रधानमंत्री नरेन्द्र मोदी लोकसेवा दिवस रे मौके कह्यो-देश साफगोई अर नवाचार मांय नुवा मानक बणा रह्यो हैं
- रक्षामंत्री राजनाथ सिंह आबूरोड़ रा शांतिवन ऊं पैली वाळा फौजियां सारु सेल्फ एम्पावरमेंट कैम्पेन री सरुआत कीनीं
- प्रदेश मांय खनन योजना रा अनुमोदन री प्रक्रिया समेत दूजा केई काम एक मई ऊं ऑनलाईन व्हेलां

000

अमेरिका रा उपराष्ट्रपति जे.डी. वेंस आज रात जयपुर पधार रह्या हैं श्री वेंस आज संवारे दिल्ली पधार्यां वां रो प्रधानमंत्री नरेन्द्र मोदी सागे मुलाकात रो कार्यक्रम हैं ई पाछे जे.डी. वेंस वां री जोड़ायत भारतीय मूल री उषा वेंस अर तीन बच्चां सागे जयपुर रा दौरा सारु पधारेलां वां सागे अमेरिका रा प्रशासन रा आला अहलकार ई आवेलां उपराष्ट्रपति वेंस रो तीन दिन ताई जयपुर मांय प्रवास रो कार्यक्रम हैं और ब्यौरो म्हारा खबरनवीस ऊं –

000

प्रधानमंत्री नरेन्द्र मोदी कह्यो हैं के लारला दस साल मांय देश मांय असरदार बदलाव निजर आयो हैं श्री मोदी आज 17वां सिविल सेवा दिवस रे मौके नई दिल्ली मांय राख्यी ज्या जळसा मांय बोल रह्या हां प्रधानमंत्री कह्यो के देश प्रशासन, पारदर्शिता अर नवाचार रा हलकां मांय नुवा मानक स्थापित कर रह्यो हैं

कार्यक्रम मांय श्री मोदी तेजी ऊं बदलता जमाना मांय दुनिया सामी चुनौतियां माथे करडी निजर राखने री जरूरत माथे जोर दीनों प्रधानमंत्री सिविल सेवकां ने जिलों के समग्र विकास, आकांक्षी ब्लॉक कार्यक्रम और नवाचार री श्रेणियां मांय लोक प्रशासन मांय बेहतरीन काम करण वाळा अहलकारां ने प्रधानमंत्री पुरस्कार दे र नवाजां लोकसेवा दिवस रे मौके जयपुर मांय राख्यी ज्या राज्य स्तर रा जळसा मांय मुख्यमंत्री भजनलाल शर्मा कह्यो के लोकसेवकां ने सेवाभाव सागे काम करणो चाहिजें

जळसा मांय मुख्यमंत्री उद्योग विभाग रा प्रमुख सचिव अजिताभ शर्मा अर पेंशन विभाग रा निदेशक देवराज ने सीएम एक्सीलेंस अवार्ड दे र नवाजां व्यक्तिगत श्रेणी मांय उदयपुर री संभागीय आयुक्त प्रज्ञा केवलरमानी अर सवाईमाधोपुर री जिला कलेक्टर शुभम चौधरी रो ई मान करी ज्यों मुख्यमंत्री आज चूरु मांय राख्यी ज्या संकल्प समारोह मांय ई शिरकत कीनीं ई मौके वे यमुना नदी रो पाणी राज्य रा शेखावाटी हलका ताई लावण रो वायदो दोहरायों वे कह्यो के सरकार किसानां ने पाणत सारु जरूरी पाणी मुहैया करावण बाबत् लगातार काम करेलां

मुख्यमंत्री झुंझुनूं जिला रा मलसीसर मांय कुंभाराम लिफ्ट परियोजना रो जायजो लीनो अर बंधा मांय पानी भेलो करण अर वितरण व्यवस्था रा बारा मांय जाणकारी लीनीं श्री शर्मा उनाळा मांय अर नहरबंदी रे दौरान पीवण रा पाणी री जरूरी पूर्ति रा ई हुकम दीनां मुख्यमंत्री सीकर जिला रा दांतारामगढ़ मांय ई जनसभा ने सम्बोधित कीनां

000

उपराष्ट्रपति जगदीप धनखड़ आज जयपुर रा दौरा सारु पधार्यां वे फेडरेशन ऑफ राजस्थान ट्रेड एण्ड इंडस्ट्री— फोर्टी री ओर ऊं राष्ट्र निर्माण में व्यापारियों की भूमिका मुद्दा माथे राखी ज्या कार्यक्रम मांय कह्यो के कारोबारी समुदाय रो समाज बणावण मांय मोटो काम हैं

उपराष्ट्रपति प्रदेश रा औद्योगिक विकास रा बारा मांय ई कारोबारियां सागे चर्चा कीनीं ई दौरान श्री धनखड़ कारोबारियां सामी आवण वाळी चुनौतियां रा बारा मांय हई विचार कीनीं

000

रक्षामंत्री राजनाथ सिंह आज सिरोही ज़िला मांय आबूरोड रा शांतिवन ऊं फौज रा जवानां सारु खुद ने ताकतवर बणावण रा अभियान सेल्फ एम्पावरमेंट कैम्पेन री सरुआत कीनीं ई मौके रक्षामंत्री कह्यो के फौज री बदौलत देश हमेशा सुरक्षित महसूस करे हैं वे कह्यो के देश री सरहद री हिफाजत सारु फौजियां रो मज़बूत व्हेवणो ज़रूरी हैं

श्री सिंह कह्यो के घर—परिवार ऊं दूर मुश्किल हालात मांय दायित्व पूरा करण वाळा फौजियां सारु शरीर री ताकत सागे मानसिक शक्ति अर शांति ई ज़रूरी हैं रक्षामंत्री समाज मांय शांति अर सद्भावना रो संदेश देवण मांय ब्रह्मकुमारी संस्थान री कोशिशों री सराहवणा कीनीं

रक्षामंत्री री मौजूदगी मांय फौज अर ब्रह्मकुमारी संस्थान बीचे करार माथे ई सही करी ज्यीं ई रा तैत संस्थान रो सुरक्षा सेवा प्रभाग पूरा देश मांय फौज रा रिटायर व्ह्या अहलकारां अर जवानां सारु हर महीना सेल्फ एम्पावरमेंट प्रोग्राम चलावेलां

000

केन्द्रीय मंत्री अर अलवर रा सांसद भूपेन्द्र यादव आज खैरथल—तिजारा मांय जिला विकास समन्वय अर निगराणी समिति री मीटिंग ले र विकास रा न्यारा—न्यारा कामां रो जायजो लीनों मीटिंग मांय ज़िला मांय जलजीवन मिशन रा तैत कर्या जा रह्या काम, स्वच्छ भारत मिशन अर पीएम सूर्यघर मुफ्त बिजली योजना समेत न्यारा—न्यारा मुद्दां माथे चर्चा करी ज्यीं

000

प्रदेश मांय खनन योजना अनुमोदन री प्रक्रिया समेत कुछ और काम 1 मई ऊं ऑनलाइन करण रो फैसलो कीनो हैं खान विभाग रा प्रमुख शासन सचिव टी. रविकान्त आ जाणकार दीनीं वे बतायो के इण ऊं खनन हलका रा काम साफगोई सागे कर्या जा सकेलां टी. रविकान्त बतायो के खनिज विभाग अब ठेकां ऊं जारी करी जावण वाळी रसीदां ई ऑनलाइन तरीका ऊं देवेलां श्री रविकान्त कह्यो के नुवी व्यवस्था ऊं करीब 30 हजार अप्रधान खनिज लीजधारकां अर क्वारी लाइसेंस धारकां ने फायदो मिलेलां

000

प्रदेश मांय आखा तीज अर पीपल पूण्यू रे मौके बाळक जोड़ां रा ब्याह री शंका ने ध्यान राखता थकां न्यारी—न्यारी ठौड़ां जागरुकता कार्यक्रम राख्या जा रह्या हैं आं रे जरिये लोगां ने बालपणा मांय ब्याह री रोकथाम मांय भागीदारी करण री अपील करी जा रही हैं डीग मांय आज जागरुकता रैली निकाळी ज्यीं महिला अर बाल विकास अधिकारी अर्चना पीपल बतायो के स्कूलां मांय ई बच्चां ने बाळपणा मांय ब्याह रा गलत असर री जाणकारी दी जा रही हैं

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय ई दीतवार 27 अप्रैल ने विचार बतावेलां आ ई कार्यक्रम री 121वीं कड़ी व्हेलां ई सारु आप ई 25 अप्रैल ताई सुझाव भेज सको हों आप मुफ्त नम्बर 1800—11—7800 डायल कर र राय दे सको हों नरेंद्र मोदी एप या माय जीओवी ओपन फोरम रे जरिए ई सुझाव दिया जा सके हैं

000